

# Banjir luar biasa di Pantai Timur

Oleh NADZARUL AMIR ZAINAL  
AZAM, FIRDAUS HASSAN,  
LUKMAN HAKIM AB RAHIM,  
YATIMIN ABDULLAH, JULIA RAIS,  
MEGAT LUTFI MEGAT RAHIM,  
MOHD. YUNUS YAKKUB dan ADHAM SHADAN  
[berita@kosmo.com.my](mailto:berita@kosmo.com.my)



PENDUDUK menggunakan sampan untuk berpindah dari rumah mereka di Kampung Bukit Rangin, Kuantan.

KUALA LUMPUR – Keadaan banjir di enam buah negeri semalam semakin buruk apabila lebih 41,098 mangsa terpaksa mendapat perlindungan di pusat-pusat pemindahan. Banjir itu yang disebabkan fenomena kedudukan bulan berhampiran dengan bumi mengakibatkan berlakunya air pasang besar di Pantai Timur selain hujan lebat yang turun secara berterusan di Pantai Barat. Kelantan merupakan negeri paling teruk dilanda banjir dengan jumlah mangsa dipindahkan setakat pukul 10 malam tadi ialah 21,594 orang diikuti Terengganu (12,403), Pahang (6,286), Sabah (287), Perlis (93) dan Perak 435 orang.

Pegawai Meteorologi Kanan Pusat Cuaca Nasional, Jabatan Meteorologi Malaysia, Dr. Mohd. Hisham Mohd. Anip berkata, keadaan banjir menjadi lebih teruk apabila ditambah dengan tiupan angin Monsun Timur Laut secara konsisten merentasi Laut China Selatan ke negara ini bermula bulan November hingga Mac.